

## Morning Regional Dogri News Bulletin, 16<sup>th</sup> April 2024

मार्निंग डोगरी न्यूज़ बुलेटिन, समें. 09-20 Hrs



### Headlines

1. चुनां आयोग नै हर योग्य मतदाता गी वोट पाने च सखाल लेई केई नमियां सुविधां शुरू कीती दियां न, जिंदे च 85 ब'रे कोला उप्परली उमरी दे बर्जुग ते मती अक्षमता आले दिव्यांगं लेई घरै थमां वोट पाने दी सुविधा बी शामिल ऐ।
2. बीजेपी नेता ते केन्द्री गृहमंत्री अमित शाह होर अज्ज जम्मू च इक चुनां रैली गी संबोधत करगंन।
3. रामबन जिले च केई थाहरें पहाड़ें परा कुप्पड़ ते पस्सियां पौने कारण जम्मू श्रीनगर राष्ट्रीय जरनैली शिड़क गड़िडएं दी आओजाई लेई बंद ऐ।
4. कटुआ जिला प्रशासन आस्सेआ मतदाताएं दी जागरूकता ते उत्साह बधाने लेई केई पैहलकदमियां जिला चुनां अफसर डॉ. राकेश मिन्हास होरें शुभांकर इलैक्ट्रा ते चुनां दूत "पखरू" जारी कीता।



### Voting Facility

चुनां आयोग आस्सेआ इक ऐतिहासक पैहल तैह्त बर्जुग ते दिव्यांग मतदाताएं आस्तै लोकसभा चुनां 2024 लेई इक विल्कप उपलब्ध करोआया गेआ जेह्दे तैह्त ओह् घरै थमां बी मतदान करी सकदे न। 85 ब'रें थमां मते उमरी दे बर्जुग लोक ते 40 फीसद अक्षमता आले दिव्यांग विकल्प गी चुनी सकदे न। इस श्रेणी तैह्त पैहले गेड़ ते दुए गेड़ लेई मतदान करने आला कम्म पैहले गै शुरू होई गेदा ऐ। इस जतन दा मकसद हर इक मतदाता गी चुनावी प्रक्रिया च शामिल करना ऐ। इस जतन तैह्त चुनां कर्मी ते सुरक्षाकर्मी मतदाता दे घर जाइयै ओह्दा मतदान करोआ'रदे न। मतदाता गी पैहले गै सूचित करी दित्ता जंदा ऐ ते फही एह् दल ओह्दे घर जंदा ऐ तां जे ओह् वोट रमानदारी कन्नै पाई सकन। मतदाता गी एसएमएस राएं बी जानकार बनाया जंदा ऐ। पूरी प्रक्रिया दा वीडियो बनाया जंदा ऐ तां जे पारदर्शिता जकीनी बनी सकै।



Amit Shah

केन्द्रीय गृहमंत्री अमित शाह होर जम्मू दे पलोड़ा थाहर इक चुनावी रैली गी संबोधत करगन। आम लोकें जेहड़े रैली च हिस्सा लै'रदे न, लेई सरबंधी इक सलाह जारी कीती गई ऐ। बीजेपी दी जम्मू कश्मीर इकाई दे अध्यक्ष रविन्द्र रैणा होरें आखेआ जे पार्टी कार्यकर्ताएं आस्सेआ आम लोकें दी सहूलत लेई लोड़चदे इंतजाम कीते जा'रदे न। इत्थें बुनियादी सहूलत पर लोकें लेई उपलब्ध होग। एह रैली बीजेपी दे जम्मू पार्लिमानी हल्के लेई मेदवार जुगल किशोर शर्मा हुंदे कार्यक्रम च कीती जा'रदी ऐ।



## National Highway

जम्मू श्रीनगर राष्ट्रीय जरनैली शिड़क रामबन जिले च किशतवाड़ी पत्थर थाहर पस्सी ते केई होरने थाहरें पहाड़ें परा कुप्पड़ पौने कारण गडिडएं दी आओजाई लेई बंद ऐ। जानकारी मूजब पूरे रस्ते भारी बरखा बरै करदी ऐ। लोकें गी सलाह जारी कीती गई ऐ जे जिच्चर मौसम च सुधार नेई होई जंदा जरनैली शिड़कै पर सफर करने दा बचन।



## PM-Modi

भारती जनता पार्टी दे वरिष्ठ नेता ते प्रधानमंत्री नरेन्द्र मोदी होरें आखेआ ऐ जे जम्मू कश्मीर दी किस्मत दफा 370 दे हटने परैत बदली ऐ। उनें आखेआ जे दफा 370 गी खत्म करने दी हिम्मत भारती जनता पार्टी नै दस्सी ऐ। प्रधानमंत्री होरें आखेआ जे इक राष्ट्र इक चुनां उंदी सरकार दी वचनबद्धता ऐ। उनें आखेआ जे साबका राष्ट्रपति रामनाथ कोविंद हुंदी अध्यक्षता च इक कमेटी खडेरी गई जेहदे च इक राष्ट्र इक चुनां बारे सकारात्मक सुझाह हासल होए न।



## Rajnath Singh

रक्षा मंत्री राजनाथ सिंह होरें आखेआ ऐ जे भारत कोल ऐसी ताकत ऐ जेहदे दम उप्पर ओह अपनी धरतै थमां दुश्मन गी निशाना बनाई सकदा ऐ ते बन्ना पार करियै दुश्मन दे इलाके च जाइयै बी उसी निशाना बनाई सकदा ऐ कीजे भारत कोल दुनिया दी बेहतरीन फौजी ताकत ऐ। जम्मू दे कठुआ जिले च इक चुनावी रैली गी संबोधित करदे होई राजनाथ होरें आखेआ जे प्रधानमंत्री मोदी हुंदे नेतृत्व तैहत भारत सब्बनें मोर्चे पर दुनिया दे सब्बनें शा ताकतवर मुल्ख दे तौर पर उभरेया ऐ। उनें इब्बी आखेआ जे उंदी सरकारै त्रै तलाक आली बिदत गी खत्म करियै महिलाएं गी बाअख्तियार बनाया ऐ।



## Kishtwar Ram Navmi

किश्तवाड़ दे जिला विकास कमीशनर डॉ. देवांश यादव होरें कल बक्ख-बक्ख मैहकमें दे अधिकारिएं ते सरबंधी घड़ें दी इक बैठक दरान रामनौमी उत्सव दिएं तैआरिएं दी समीक्षा कीती। बैठका च मजूद सनातम धर्म सभा दे प्रतिनिधिएं केई सुझाह बी दित्ते जिंदे च ध्यार दे मौके बिजली, पानी, साफ सफाई, ट्रैफिक प्रबंधन ते राशन ते खाने पीने दिएं चीजें दी सप्लाई, प्रबंधन ते बवस्था सरबंधी सुझाह शामिल हे। डीसी होरें सरबंधत मैहकमे गी निर्देश दित्ता जे रामनौमी दा ध्यार पूरी चाल्ली रमानदारी ते बवस्था आले ढंगे सिर तोड़ चाढ़ने लेई लोड़चदे सब्बे जरूरी इंतजाम कीते गे न। उनें मंदरें दे आले दुआले साफ सफाई, बिजली ते पानी दी निर्विघ्न सप्लाई, ट्रैफिक बवस्था सबकिश पैहले थमां करी रखने दा निर्देश बी जारी कीता। उनें चेचे तौरा पर कुसै बी आयोजन दरान आदर्श आचार संहिता दी अनदिक्खी जा खलाफवर्जी कोला बचने दा बी निर्देश दित्ता।



## Kathua DEO

जिला चुनां अधिकारी डॉ. राकेश मिन्हास हुंदे आस्सेआ जिला चुनां शुभाकर "इलैक्ट्रा" ते चुनां दूत पखरू जारी कीते जाने दे कन्नै गै समूलचे कटुआ जिले च चुनाएं दा जोश केई गुणा बधी गेआ ऐ। कटुआ कस्बे दे मुखर्जी चौक च आयोजित इक कार्यक्रम दरान उनें इलैक्ट्रा दी शुरूआत कीती जेहड़ा चुनाएं च हिस्सा लैने लेई लोकें अंदर इक ऊर्जा दा संचार करने दा प्रतीक ऐ। इसै चाल्ली चुनां पुखरू इक चमत्कारी दूत आला लेखा लोकतंत्र दे जज्बे गी मजबूती होई मतदाताएं अंदर चुनावी जागरूकता दा संचार करदा ऐ। डॉ. मिन्हास होरें इनें शुभाकरें दे महत्व पर लोह पाई जिंदा उद्देश्य चुनाएं दरान इक जागरूक शैहरी दे रूपै च सौची समझिए वोट पाने बारे फैसला लैने च मदद करना ऐ। उनें जिला चुनां दफ्तर दे मतदाताएं गी नमिएं काहड़ें ते तरीकें राएं जागरूक बनाने दे धेइयै गी फही पक्का कीता।



## SVEEP Ramban

रामबन जिले च जिला प्रशासन आस्सेआ सनासर च स्वीप अभियान तैहत इक जागरूकता अभियान चलाया गेआ। इस दरान अतिरिक्त जिला विकास कमीशनर होरें उत्थें मजूद मकामी लोकें, नोजवानें ते सैर सपाटे लेई आए दे सैलानिएं गी बी वोट दा महत्व ते वोट पाने दी जिम्मेदारी समझने बारे जागरूक कीता। उनें सब्बने गी आक्खेआ जे औंदे लोकसभा चुनां 2024 च बधी चढ़ियै हिस्सा वोट पाने दे अधिकार दा इस्तेमाल जरूर करन ते देश दे भविक्ख गी रूप देने च अपना योगदान देन। जेहदे तैहत 19 अप्रैल गी पैहले गेड़ तैहत उधमपुर-कटुआ-डोडा सीट लेई मतदान होना ऐ।



## Chief Army Staff

नमीं दिल्ली ते ताशकंद बश्कार रक्षा सैहयोग गी मजबूत करने आस्तै थल सेनाध्यक्ष जनरल मनोज पांडे होर उज्बेकिस्तान दे 4 दिन दे दौरे पर न। इस दरान बड़डे सेना अधिकारिएं कन्नै गल्लबात करदे दे इलावा सेना प्रमुख भारत ते उज्बेकिस्तान दे सशस्त्र बलें बश्कार सांझा अभ्यास दिक्खने लेई 18 अप्रैल गी टर्मेज बी जांगन। दौनें मुखें बश्कार यूक्रेन संघर्ष दे अलावा आतंकवाद दा मुद्दा बी प्रमुखता कन्नै पुट्टेआ जाग।



## India France

आतंकवाद कन्नै निबड़ने लेई भारत फ्रांस संयुक्त कार्य समूह दी 16मीं बैठक कल नमीं दिल्ली च लग्गी। बैठक दरान दौनें पक्खें आतंकवाद रोधी चुनौतिएं दा आंकलन कीता। जेह्दे च आतंकवादिएं आस्सेआ नमीं ते उभरदी तकनीकें दा इस्तेमाल, आतंकवादी कारवाइएं जां फही मकसद लेई इंटरनेट दा गलत इस्तेमाल, कट्टरवाद ते आतंकवादिएं गी माली मदद करना शामिल ऐ। विदेश मंत्रालय नै आक्खेआ ऐ जे भारत विरोधी अलगाववादी गतिविधिएं ते आतंकवाद सरबंधी कारवाइएं लेई माली इमदाद संगठित अपराध ते नशीले पद्धार्थें सरबंधी आतंकी नेटवर्क पर बी चर्चा होई। दौनें पक्खें अपने अपने क्षेत्रें च आतंकवादी खतरे पर बी विचारें दा आदान-प्रदान कीता, एह्दे च अफगानिस्तान-पाकिस्तान, क्षेत्र च आतंकवादी गतिविधिएं दे अलावा दक्खन एशिया, अफ्रीका ते मध्य-पूर्व च किश सरकारें आस्सेआ बन्ने पार दुए मुखें च आतंकवाद फैलाना जनेह् मुद्दें बी शामिल हे। दौनें पक्खें सूचना दे आदान-प्रदान, क्षमता निर्माण, सिखलाई कार्यक्रमें ते होरने मामलें पर सैहयोग गी मजबूत करने दे महत्व पर जोर दित्ता।



## IPL

आईपीएल क्रिकेट च कल बेंगलुरु दे एम.चिन्नास्वामी स्टेडियम च सनराइजर्स हैदराबाद नै रॉयल चैलेंजर्स बेंगलोर गी 25एं रंजें कन्नै हराई दित्ता। 288 रंज दे लक्ष्य दा पिच्छा करदे होई रॉयल चैलेंजर्स बेंगलोर दी टीम शड़े 20 ओवर खेडिड्यै 7एं विकटें दे नुकसान पर 262 रंज गै बनाई सकी। एह्दे शा पैहले, पैहले बल्लबाजी करदे होई सनराइजर्स हैदराबाद नै 20एं ओवरें च त्रऊं विकटें दे नुकसान पर 287 रंज बनाए। अंकें दे साब्वै सनराइजर्स हैदराबाद चौथे नंबर पर ऐ। जिसलै के रॉयल चैलेंजर्स बेंगलोर दी सब्बने शा हेठ ऐ। अज्ज कोलकाता दे ईडन गार्डन च कोलकाता नाईट राइडर्स दा मकाबला राजस्थान रॉयल्स कन्नै होग। एह मैच संजा साढ़े 7 बजे शुरू होग।